

Uunga siunnersuut: Nioqqutissanik eqqussuinermi akitsuutit pillugit Inatsisartut inatsisaata allanngortinneqarnera pillugu Inatsisartut inatsisaat
(Akitsuutinik appaaneq atorunnaarsitsinerlu)

Akissuteqaat

(Aningaasaqarnermut Akileraartarnermullu Naalakkersuisoq)

Aappassaaneerinnineq

Naalakkersuisut Aningaasaqarnermut Akileraartarnermullu Ataatsimiititaliaq siunnersuutinik marlunnik suliaqarneranut qujassuteqarfigaat, ataatsimiititaliamilu amerlanerussuteqartut sukkunut tipigissaatinullu il.il. eqqussuinermi akitsuutip atorunnaarsinneqarnissaanut siunnersuummik tapersiinerat paasillugu, soorluttaaq sodavandinut il.il eqqussuinermi akitsuutip nuna tamakkerlugu literimut 5,75 kr-nik appartinneqarnissaa amerlanerussuteqartunit kissaatigineqartoq.

Akerlianik qummoroortaatitut akitsuutip appartinneqarnissaanut amerlanerussuteqartoqanngilaq. Ataatsimiititaliap tassunga inassuteqaataa Naalakkersuisut tusaatissatut tiguaat, UPA 2024/161-llu pingajussaaneerneqarnissaanut allannguutissatut siunnersuummik saqqummiussissallutik, taamaalilluni siunnersuutip ilaa tassunga tunngasoq peerneqassalluni.

Naalakkersuisut Siumumik Inuit Ataqtigiinnillu akileraartarnermut aaqqissuusseqinnissamut isumaqtigiissuteqarsimagaluarpataluunniit, qanoq akileraartarnermut akitsuusiisarnermullu politikip sapinngisamik pitsaanerpaamik ilusilerlugulu nalimmassarnissaanut siunnersuutinut isumassarsiatsialannullu Naalakkersuisut tusaaniartuassapput. Peqatigisaanik Naalakkersuisut ukiuni aggersuni sallertut isumaqtigiissummi immikkuualuttunik assigiinngitsunik piviusunngortitsiniarnissaq pingaarnerutissagaat ilimagineqassaaq. Tassungalu atatillugu suliassanik tamakkiisunik kivitsinissamut killilimmik isumalluutinik atugassaartoqarnera, taamaammallu suliassat allat naammassineqarnissaasa tungaannut, suliassat ilaasa allatut ajornartumik kinguartinneqartarsinnaanerat partiinut tamanut eqqaasitsissutigerusuppara.

Taama oqaaseqarlutik Naalakkersuisut inatsisissatut siunnersuutip pingajussaaneerneqarnissaa qilanaaraat.